



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

Tir Yimyim

tiryimyim@aolima

tir yimyim

TAPAK 8

PM Modi-i PSA Oxygen plant 35 semzüksü

Philippine tir menden atema Leni Robredo-i tokteptsü



VOL. XIX NO. 1 (ADOK 1) DIMAPUR

ROGONÜ (FRIDAY) MONGPUTENI (OCTOBER) 08, 2021

₹ 5.00

NSCN/GPRN ajanga AK Mishra ajuru

Dimapur, Mongputeni/Oct. 07 (TYO): Collective leadership Gen. Niki Sumi (Rtd) aser Ino. Starson Lamkang Naga nati anir NSCN/GPRN ajanga Delhi nung Interlocutor for Naga Peace talk, AK Mishra ajura liasü, ta MIP, NSCN/GPRN sangdong ka ajanga ashi.

NSCN/GPRN ajanga AK Mishra dang yimjung asoshi aser Naga peace talk atema bendanga agütsür inyakba metetdaksü aser Government of India den NSCN/

GPRN ajanga ceasefire agreement yanglushiba indang ashi.

Ajidang masü Naga nungeri aginüba aser janraba ama ajak densema aser ajaki agizükettetsüsa yimtenren telemtetba agitsü indang pa dang ashi.

Naga nunger yimjung maparen nung NSCN/GPRN ya temeja ka asünung, Government of India Representative dang NSCN/GPRN ya Naga nungeri aginüba aser janraba nungb nokdaka lir, ta nenshia ashi.

58 Shamator-Chessore AC bye-election nung NDPP nungi Keoshu Yimchunger-i tokteptsü



NDPP tir Chingwang Konyak-i Kesohu Yimchunger nem 58 Shamator-Chessore Assembly Constituency bye-election atema ticket agütsüba mapang tangokba noksa ka yangi angur.

Dimapur, Mongputeni/Oct. 07 (TYO): Tuensang district kübok 58 Shamator-Chessore Assembly Constituency nung October 30 nü agitsü aliba bye-election nung tokteptsü atema Nationalist Democratic Progressive Party (NDPP) ajanga S. Keoshu Yimchunger shimteto.

Iba menden ya July 1, 2021 nü taoba Advisor, Information & Public Relations, SCERT and Village Guards, Toshi Wungtung asüba ajanga tazüing akum.

Chumukedima nung aliba NDPP office nung October 7, 2021 nü ticket agütsüba sentong ka agiba mapang United Democratic Alliance indang candidate ka ama party-i Keoshu Yimchunger nem ticket ya agüja liasü.

Iba sentong nung jembiba mapang NDPP aser alliance partners temi pa nem party ticket agütsüba atema Keoshu Yimchunger-i NDPP nem tenünsang agütsü.

Iba election nung takok ngura, party nung tashi anga alitsü aser constituency nung temelenshi tajung bener arutsütsü, ta pai ashi.

Power Transmission Line anepalutsü atema arem müreksü

Dimapur, Mongputeni/Oct. 07 (TYO): Power supply agütsüba nung timtem majurutsü mechi Wokha district kübok 132KV,66V & 33KV Lines anepalutsü aser arem müreksü maparen October 9, 2021 nungi October 16, 2021 tashi anepdang 8:00 ako nungi nikongdang 3:00 ako tashi inyaksü sentong lir, ta Executive Engineer, Transmission Division, Kohima Nagaland sangdong ka ajanga Wokha district nung aliba niburtem nem metetdaksüogo.

Department ajanga total shutdown ya tajemba

Ajidang masü, 2023 general election atema party tashi itshitsü atema pai inyaksü, ta ashi.

Paisa Chief Minister Neiphu Rio, NDPP tir Chingwang Konyak aser alliance partner dang pelaba lemsatop aser niburtem atema bendanga agütsür inyaksü nangzüka liasü.

Iba sentong nung BJP aser NPF telokia bye-election nung NDPP candidate yaritsü sangdonga liasü. BJP aser NPF ya tawa tentetba United Democratic Alliance nung züngsem lir.

Taoba mapang Noksen Assembly Constituency bye-election nung ama tang shimteta aliba candidate den tokteper malitsü amanger, ta NDPP tir Chingwang Konyak-ia iba sentong nung ashi.

BJP tenüng nung Vice President, BJP Nagaland, Hurui Zeliang-i jembiba mapang, Keoshu Yimchunger nem ticket agütsüba asoshi pelaba lemsatopa liasü.

Iba ya ajanga alliance tali tashi itshitsü aser BJP züngsemtemi akok tashi yaritsü, ta pai ashi.

Senior Vice President, NPF Pusazo Luroo ajanga sentong nung NPF Party tenüng nung salem lemsatop aser 58-Shamator-Chessore Assembly Constituency nung aliba niburtem dang Keoshu Yimchunger yaritsü ayongzüka liasü.

58-Shamator-Chessore Assembly Constituency bye-election atema nomination agütsüba maparen October 1 nü tenzüko ager October 8, 2021 tashi alitsü. Iba sülen nomination paper tem ya October 11 nü scrutiny asütsü aser October 13 tashinung nomination withdraw sütettsü. Vote ya November 2, 2021 nü azüngtsü.

kumdaksütsü merangtsü, saka iba maparen inyakba mapang tesem kar nung power supply nung timtem ajurutsü, koba paidoktsü makok, anunggi consumer aser niburtemi timtem aremsü mepishir, ta sangdong ajanga ashi.

Wokha district nung arem chidoka müreksü atema anogo yamai alitsü:

October 9, 2021 nungi October 10, 2021 -132KV DOYANG nungi SANIS.

October 11, 2021 nungi October 12, 2021- 132KV WOKHA nungi SANIS.

October 13, 2021 nungi October 16, 2021- KOHIMA nungi WOKHA.

Vice President M Venkaiah Naidu Nagaland tonga aruogo



(Noksa abelen) Nagaland Chief Minister Neiphu Rio, Deputy Chief Minister Y Patton nungertemi October 7, 2021 nü Dimapur Airport nung India linük tatong tir Venkaiah Naidu agizükba mapang tangokba angur. (Noksa achichi) Tatong tir, Venkaiah Naidu-i October 7, 2021 nü ICAR National Research Centre on Mithun, Jharnapani, Medziphema, Dimapur semdangba mapang tangokba noksa angur.

Dimapur, Mongputeni/Oct. 07 (TYO): India linük tatong tir M Venkaiah Naidu October 7, 2021 nü Dimapur Airport tonga aruba sülen Nagaland Chief Minister Neiphu Rio, Deputy Chief Minister Y Patton, Chief Secretary Nagaland, Jane Alam; DGP Nagaland, John Longkumer; Deputy Commissioner, Dimapur, Rajesh Soundararajan IAS; Commissioner of Police, Dimapur, Rothihui Tetseo IPS aser administrative aser police nung lenirtemi agizüka liasü.

Tatong tir Dimapur Airport atongba sülen Guard command of Assistant Commandant, Medemkala Tzudir lenisüba kübok 15th NAP, Mahila Battalion ajanga Guard of Honour akum agüja liasü.

Iba sülen Vice President Naidu-i ICAR National Research Centre

on Mithun, Jarnapani, Medziphema, Dimapur semdang, kong Director ICAR (Mithun), Dr. M.H. Khar; Principal Scientist NRC Mithun, Dr. N. Haque; Joint Director ICAR Nagaland Centre, Dr. Raj Khowa; ADC Medziphema, Imsong Meren; SDO (Civil) Tokai V Sumi aser ICAR scientist temi pa agizüka liasü.

Iba mapang pa meina Assam aser Nagaland Governor Jagdish Mukhi, Deputy CM, Y. Patton; Minister, Agriculture, G. Kaito Aye aser DC Dimapur, Rajesh Soundararajan nungertem oa liasü.

ICAR National Research Centre on Mithun, Jarnapani nung India tatong tiri sü takum repranga chiyongtsü agütsü aser exhibition hall semdanga yangji alirtem den

jembia liasü.

Naidu-i North East region semdangba tepela lemsatop aser North East Region nung iba shiruru wazüka ayutsü atema manei inyaksü ajungshia liasü.

Paisa iba Institute indang angashiba aser metetba tepela lemsatop aser ICAR nung inyaker scientist aser nisungtem dang mapa nung tali rangloker inyaksü ajungshia liasü.

Iba sentong nung Director ICAR (Mithun), Dr M.H. Khar ajanga pela agizükba o jembi aser paisa ICAR ajanga takok anguba aser terenlok maparen balala inyakba indang rasaa ashi.

Joint Director ICAR (NEH) ajanga ICAR inyakyim indang ashi aser Dr. Nazrul Haque-i melepzüing o jembia liasü.

Nagaland COVID-19: Cases tasen 24, taneptsü angur 21

Kohima, Mongputeni/Oct. 07 (TYO): Nagaland nung October 7, 2021 nü COVID-19 positive cases 24 putetba aser tasüba ka liasü. Tang tashinung state nung COVID-19 tashidak agi menepir nisung 31,397 alitsü aser tasüba nisung 668 alitsü.

"Tanü COVID-19 positive cases 24 putetba ya Dimapur nung 13, Kohima aser Mokokchung nung pungo-ngu aser Phek nung ka alitsü," ta State Nodal Officer for Integrated Disease Surveillance Project, Dr Nyanthung Kikon-i anogoshi sangdongba COVID-19 bulletin nung ashi.

Pai ashiba agi, tesüiba ghonda 24 tsüngta COVID-19 agi menepa alir nisung 21 taneptsü nguogo aser item ya Dimapur, Kohima aser Mokokchung nung trok-rok, Kiphire nung ana aser Peren nung ka alitsü. State nung iba tashidak nungi taneptsü angur nisung 29,411 kumogo aser taneptsü anguba rate

ya shilem 93.67 alitsü, ta pai ashi.

Tang state nung coronavirus agi menepir nisung 313 lir aser item rongnung nisung 62 dak temang nung iba tashidak agi timtem agütsüba sümia lir, nisung trok tera timtemer, nisung 15 kanga mejungi kangshir aser nisung 230 dak temang nung timtem agütsüba mali, ta pai ashi.

Dimapur district nung COVID-19 agi shiranger ka asüba ajanga state nung iba tashidak agi asür nisung 668 ajunger aser item rongnung nisung 15 dak danga tashidak keta liasü, ta Dr Kikon-i ashi.

Ajak senteper COVID-19 tashidak agi menepa alir nisung 1,005 danga state temi ogo, ta pai ashi.

Tang tashinung Nagaland nung COVID-19 tashidak alitsü temolung melemtemi sample 379,801 tendangogo aser item ya RT-PCR

nung 110,024, TrueNat nung 83,746 aser Rapid Antigen Test nung 186,031 tendanga liasü, ta pai ashi.

Bodhbarnü tashinung Nagaland nung nisung 693,643 nem COVID-19 vaccine doses 10,90,985 agütsüogo, ta State Immunization Officer, Dr Ritu Thurr-i ashi.

State nung COVID-19 vaccine agir alirtem rongnung frontline nung inyaker nisung 60,942, healthcare nung inyaker nisung 15,996, arishi küm 45 nungi tema nisung 199,185 aser arishi küm 18 nungi 44 tsüngta nisung 417,520 alitsü, ta pai ashi.

Nisung 396,890 nem vaccine dose tanabuba agüja parnok vaccination course tembangogo. Parnok ya frontline nung inyaker nisung 47,565, healthcare nung inyaker 13,294, arishi küm 45 nungi tema nisung 142,802 aser arishi küm 18 nungi 44 tsüngta nisung 193,229 alitsü, ta Dr Thurr-isa ashi.

NBSE-i tatidang indang osang metetdaksüogo

Dimapur, Mongputeni/October 7 (TYO): Taoba mapang osang agütsüba maneni lephsia Nagaland Board of School Education-i sangdong ka ajanga board kübok züngoksema aliba school ajak dang, Class VIII tatidang (sorkar school tem atema) aser Class IX final tatidang ya board-i shilem balala küma lemsar October 25 nungi tenzüka offline mode nung agitsü ta metetsaksüogo.

Routine tejangja mapang tatsüka tsüngda board-i

metetdaksütsü.

Private school tema ajak iba tetuyuba sülen anidaktsü aser kasa routin nung class VIII tatidang agitsü.

Class VIII aser IX atema subject ajak indang tasüngdangba blueprints annexures nung agüja lir.

Anunggi institutions tekolaktemi tatidang atema subject tem indang blueprints jangjaa ayutsü aser annexures nung agüja aliba ama subject ajak indang Blueprints sülen anidaktsü atema tesayurtem nem

tetuyuba agütsütsü metetdaksüogo. Blueprints ya board indang portal nung angutsü.

Maneni institutions tekolaktem dang question paper blueprints indang metetdaksütsü mepeshia asüngdangogo. Tesayurtemi kaketshirtem dang lensayutsü imlar. Kasa mapang nung kaketshirtem nema subject balala indang blueprints indang metetdaksütsü, ajita asünungdang parnoki tatidang junga agütsütetsü, ta kasa sangdong ajanga metetdaksü.

FOCUS aser IFAD na UN House nung senden amen



FOCUS aser IFAD na UN House nung senden agiba sülen tangokba yangi noksa nung angur.

Dimapur, Mongputeni/October 7 (TYO): APC aser Mission Director Y. Kikheto Sema, IAS aser S. Tainiu, Jt. Secy & State Project Director nati anir FOCUS-Nagaland (Fostering Climate Resilient Farming Systems in the North East -Nagaland) project ktdangsurtem team ka Country Director, Asia aser Pacific Division Dr. Han Ulac Demirag lenisüba nung IFAD (International Fund for Agriculture Development) team ka den UN House, New Delhi nung October 7 nü senden ka menogo.

Senden nung project kübok inyakyim balala lepa reprnagshiba

mapang ken o balala aser talisa COVID-19 wara poktetba ajanga project nung tetsükdaktsü adokba indang metetdaktsü. Y. Kikheto Sema-isa, state nung tzunglu maruba ajanga timtem ajangshiba indang lemsatp aser ashiba agi, tzu security melei chiyongtsü security takok ngua mebenoktettsü.

Senden nung benoka sensak asema onüktem rongnung fund mapang shidak nung manguba ajanga project benoka inyaksü atema tetsükdaktsü adokba densema liasü. IFAD ktdangsurtemi, senotsü mapang shidak nung agütsü atema inyakyim shidak benoka

inyaktsüla ta ashi aser iba ken o bentettsü atema telok anapronglai sendaktepa inyaksü bangjem.

Advance Grant dak sendakba nung IFAD ktdangsurtemi project team dang Dept. of Economic Affairs, Ministry of Finance nem temepeshiba ka agütsü ajungshi.

IFAD-i teyari agütsüba project FOCUS- Nagaland ya Nagaland nung 2018-19 küm nungi benoka inyaka arudar aser tang tashi nung district 8 kübok yimtsüng 645 ayimjemogo. FOCUS project team tang Noklak, Tuensang aser Peren bendenloksemsü atema funding agency den sensak tesemdak lir.

NHAK nung 1000 LPM oxygen plant ka semzükogo

Kohima, Mongputeni/Oct. 07 (TYO): Advisor, Urban Development and Municipal Affairs, Dr Neikiesalie Kire ajanga October 7, 2021 nü Naga Hospital Authority Kohima (NHAK) nung Pressure Swing Adsorption (PSA) tanabuba aser tuluba ka semzüksüogoo.

NHAK nung aliba mezüngbuba plant ajanga minute ka nung litre 300 yangluteter, koba Nagaland nung oxygen generation plant mezüngbuba liasü. Iba plant ya May 17 nü Minister, Health & Family Welfare, S Pangnyu Phom ajanga semzükja liasü.

NHAK atema PSA plant tanabuba yago minute ka nung

litre 1000 yangluteter, koba Prime Minister's Citizen Assistance and Relief in Emergency Situation (PM CARES) Union Ministry of Health and Family Welfare ajanga senotsü agüja yangluba alitsü.

PSA plant yagi 'normal compressed air' nungi oxygen bendanger aser metitemi takum kumzükba gas agütsür.

Iba PSA plant semzükba ya linük tesem ajungalen Ato Kilonser Narendra Modi-i AIIMS Rishikesh, Uttarakhand nungi PSA oxygen plant 35 virtual yimya nung semzüksüba nung shilem ka liasü.

NHAK nung iba sentong nung jembiba mapang Dr Kire-i ashiba agi, Corona virus ya teti alitsü

aser kodang tembangtsüar shingala meshitettsü.

Ajungji iba tashidak den raratsü lenmang tajungtibaji pei sasa pei kumzükba dangara kumzüksüba ya lir, ta pai ashi.

Tang tensa tera tajungba lir, saka ajaki tangatetba tajung nung COVID den raratsü yimyattem agüja aliba amshitsüla, ta pai ashi.

Iba oxygen plant ajanga mozüki nung oxygen nungdakba perija nisung tali kumzüksü imlar, ta Dr Kire-i ashi.

Iba sentong nung NHAK indang Managing Director, Dr Vibeituoou Mepfu menden liasü aser Medical Superintendent Dr Sentimeren ajanga PSA plant tasenba indang tejangja rateta ashi.

Nagaland nung adokba kiwi Delhi-i benerogo



Dimapur, Mongputeni/October 7 (TYO): Nagaland sorkar kübok, Department of Horticulture aser Chansu Organic Kiwi Producer Company Limited, Pfutsero, Nagaland na longjemer October 7 nü Dimapur nungi tayimtsü ajanga Naga Organic Kiwi seret 600 Delhi-i yokogo.

Chansu nung ya

Chakhasang, Angami aser Sumi kin nungi Kiwi lu ayimer 500-i tentetba lir aser parnok ajak senteper Organic Kiwi Producer Company Limited küm tetogo. Iba project ya Kohima, Phek aser Zunheboto nung MOVCD NER kübok benoka inyakdar. Taküm October aser December tsüngda Kiwi

aongba mapang iba company yagi iba süngjang ya metric tones 300 ongtentsü imlar.

Aluyimertem nem parnok tsünütetba süngjang ya National Markets-i yoktsü atema süngjang aongba, bentetba, grading aser packaging dak sendakba nung 2021 küm September ita training ishika agütsüogoo.

Linük nung shishilembadak Nagaland nung adokba Kiwi ayoktsü atema jenjang tapet agiogo. District asem nungi A & B grade Kiwi ya Nagaland State Agriculture Marketing Board Complex, 4th mile Dimapur nung bendena cold storage nung ayutsü aser iba sülen refrigerated vehicle tem nung Kolkata, Delhi aser Bengaluru-i bener aotsü.

Nagaland nung adokba kiwi alizüksü atema Kiwi aliba company asem den sendaktepogo. Company tem rongnung Kolkata aser Bengaluru atema Big Basket aser Desai Agri Foods Sonapat aser Suri Agro Fresh, New Sabzi Mandi, Azadpur, Delhi densema lir.

FAC nung Webinar ka ayongzükka agi

Dimapur, Mongputeni/October 7 (TYO): Seminar Committee, Fazl Ali College, Mokochung-i, "Covid-19: Chemical Preventive Measures and Drug Developments" onük nung ajemdaker October 6 nü Interdepartmental Webinar ka ayongzükka agiogo.

Sentong nung shisalen agütsürji Assistant Professor, Department of Chemistry, FAC Dr. Imliwati Longkumer liasü. Sentong lenir Chiratho M. Nyuwi, Assistant Professor, Department of Zoology, FAC-i Seminar Committee tenüng nung Webinar nung shilem agirtem pela agizük.

Sentong nung shisalen agütsür Dr. Longkumer-i, SARS-CoV-2 virus aser mesen host cell telungi ia replicate

asüba indang mechanism indang aser viral structure angatettsü aser Covid-19 atema chemical preventive measures aser mozü yanglutsü asoshi discipline ka ama Chemistry yagi koda tongtibang shilem agir, iba indang lemsatp.

Paisa, soaps, hand sanitizers aser surface sanitizers amala chemical preventive measures tem amshia mesen prokshia aoba nokdangtsü atema jenjang tapet agiba indang jembia liasü. Maneni pai Covid-19 mozü aser vaccine yangluba indang lemsatp. Iba webinar ya sentong nung shilem agirtem aser shisalen agütsür na sensak asema sülen sentong tambanga liasü, ta FAC Information and Publicity Cell sangdong ka ajanga metetdaktsü.

Mokokchung nung aonsotsü jenjang atakzüksü

Dimapur, Mongputeni/October 7 (TYO): Mokokchung Municipal telungtet nung aonsotsütem jenjang atakzüksüba ADC & Administrator, Mokokchung Municipal Council, Shashank Pratap Singh (IAS)-i sangdong ka ajanga metetdaktsüogoo. Iba dak sendakba nung

yokyatsüyartem dang atakzükja aliba jenjang agi aonsotsütem ayoktsü tetuyuba agütsüogoo.

Tetuyuba sülen manidakertem temzüng ozüing dak ajemdaker merenshitsu ta kasa sangdong ajanga metetdaktsüogoo

Aonsotsü jenjang: Tomato - Rs. 80/- per Kg, mersü- Rs. 90/- per Kg, Onion - Rs. 60/- per Kg.

Khuzama nung sen crore 1.5 alang cigarette apu



Dimapur, Mongputeni/October 7 (TYO): October 6 nü Khuzama interstate check gate nüka aliba Kohima Police team kati Manipur nungi Dimapuri oya aliba truck gari ka sot, aser sen crore 1.5 alang bendanger cigarette cartons 95 bener lia apu.

Iba dak dak sendakba nung nisung ana puogo. Ajia alisang

ana ya Mofidul Islam (22 yrs) aser Fojlul Hoque (22 yrs) ta jangjaogo. Tena den tenokdangba agütsür aliba oset aser gari pua yuogo. Iba dak ajemdaker COTPA 2003 kübok Khuzama PS nung ken o ka benokogo aser ken o maneni bushisüngdangtsü, ta PRO DEF, Kohima sangdong ka ajanga metetdaktsü.

N. Longshithung Ezung den tepila sentong agi

Dimapur, Mongputeni/October 7 (TYO): Nagaland State Legal Services Authority indang Member Secretary N. Longshithung Ezung, NJS den tepila sentong den repsema Member Secretary Victo Sema, NJS nem file amoktsüba sentong tanü Kohima nung agiogo.

Sentong nung o jembiba mapang Ezung-i, legal services tekolak ka iba amala mapa tulu abentsü ya staff temi teyari magütsü asübo mebeneteti lila ta ashi.

Pai staff tem dang, MS tasenba lenisüba nung legal services nükjidong tongtettsü atema maneni teka amteper inyaksü ajungshi.

Victo Sema, NJS-i Member Secretary mapa abentsü.

Sentong nung Project Coordinator Kezhosano Kikhi

aser Nungsangchiba Jamir natia o jembia liasü. Iba sentong ya Project Coordinator Cherry Ovung lenisüba nung agi.

Kasa mapang nung Longleng DLSA-ia Secretary Ajongba Imchen, District & Sessions Judge Zunheboto den tepila sentong ka ayongzükka agiogo.

Sentong nung o jembiba mapang Secretary Ajongba Imchen-i, pai ajangshibattem lemsatp aser obendangerterem dang nüburtem nem nungdakba mapang nung teyari agütsütsü ajungshi. Paisa, "Access to Justice for all" omen nung ajemdaker Legal Services Authority-i nüburtem ajangzüksü atema maneni inyaksü ta ashi.

Iba sentong ya District Project Assistant Monyei Phom lenisüba nung agi.

Gauhati HC-i Assam sorkar dang affidavit benoktsü tuyu



Guwahati, Mongputeni/ October 7 (Agencies): September 23 nü Assam kübok Sipajhar nung ali atsüer alirtem aninba mapang nisung tepsetba dak sendakba nung affidavit ka benoktsü atema Gauhati High Court-i Assam sorkar nem tetuyuba agütsüogo.

Sipajhar nung September 23 nü ali atsüner alirtem mintokba mapang Darrang district administration ketdangsürtem aser longkak aiter na tsüingda mangatettep adokba sülen police-i injang akhaba mapang tanur ka densema nisung ana tepseta liasü.

Gauhati High Court-i, telangzüba ka agütsütsü atema Assam sorkar nem hopta

asem atakzüktsüogo aser iba ken o ya November 3 nü angadangtsü latettsüogo.

Chief justice Sudhanshu Dhulia aser justice Soumitra Saikia nati kümetetba Gauhati High Court bench kati Assam nung opposition lenir Debabrata Saikia-i, tashiyim amshia nüburtem aninba dak sendakba nung ken o ka benokba angdanga liasü.

"Iba ya takoksa tulu aser kanga dang tia maka tatalokba ka. Aibelena alirtem mereneshitsü aser aji tejangja," ta Gauhati HC-i ashi.

Gauhati High Court-i, Assam nung BJP-i aniba sorkar dang National Rehabilitation Policy ya state nung mebenoktetsüa ta bilemer asü, ta asüingdang.

Temetetsükaji Sipajhar nung tatalokba ya social media nung ayimsünga prokshi, kong photographer, Bijoy Bonia-i police-i khaseter aliba nisung tasümgang ka dak taochi makai ajemshiba nguogo.

Kasa mapang nung, opposition lenir Debabrata Saikia-i benokba Public Interest Litigation (PIL) dak sendakba nung Gauhati High Court-i telangzüba tajung agütsüba Assam Congress-i pelashishia agizükogo.

Assam Congress-i, "police 40 dak temai longkak aiter ka dak injang akhaba tatalokba aser iba sülen sorkar den sendaka aliba cameraman kati tasümgang dak taochi makai ajemshiba ajanga alima ajunga nung nüburtem aoksadakttsüogo," ta ashi.

Piles Anepaluba - Kabiraj dang alakteta pelaba metetdakttsür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga taneptsü mangu. Ajsüaka, tang **Kabiraj H. Umar Chesam** contact no. 8416087414 / 6909717178 National awarded H. Umar Chesam surgery kecha magii (non-surgical) anepalur anogo ishika tsüingda ni taneptsü nguua liasü aser iba sülen tanü tashi kü temang nung timtem kecha mali. Time: 9 AM - 5 PM
Yours sincerely - Lorenzo Marry, Add: Lothay Colony, Dimapur



NPP office kikümbang nung IED toktsüba atema nisung ka apu



Shillong, Mongputeni/ October 7 (Agencies): October 4 nü National People's Party's (NPP) office kikümtong nung Improvised Explosive Device (IED) ka toktsüba dak sendakba nung Meghalaya Police-i nisung ka puogo. Kikümtong nung bomb tokja aliba potetli defuse süja liasü.

Police temi tang iba tatalokba nung densema alir kar bushidar. Ken odak sendakba nung nisung apuba jangjashija Chief Minister Conrad K Sangma-i tanü ashiba agi, police-i apusang yagi NPP office kikümtong ana bomb toktsüba nangzükogo. Pa apuba aser ken o ashishiba sülen ken o kanga junga bushitsüingdang tenzükogo, ta pai ashi.

Osang tejangja agütsütsü nongnanga Chief Minister-i, "kasa mapang nung nisung ka densema lir.. iba ken o nung

dang masü saka taoba mapang bomb pokdakttsüba lendong nung densema alirtem dena jangjaogo," ta ashi.

Paisa, iba tatalokba nung densema alirtem indang osang tejangja mapang tatsüka tsüingda nung jangjatsü, ta ashi.

State nung temzüng ozüing tashi meiti akümer asü ta bilemba nemtemja Sangma-i, "iba ya khen dang atalokba tatalokba ka lir. Hau onoki iba ken o kanga süoki ia agidar," ta ashi. Paisa state nung temzüng ozüing dak sendakba nung tensa junga dang lir ta ashi.

NPP office kikümtong nung IED tokja aliba potetba ya temzüng ozüing nung aibelen tulu ka ta shia pai, "police department-i iba ken o nung sendak alirtem aputsü asoshi parnoki akokba tashi inyakttsü aser iba amala tensa ya tarutsü nung mataloktsü atema jenjang tapet agitsü," ta ashi.

Mizoram nung nisung 1302 dak COVID-19 potet



Covid-19 tendangba noksa nung angur.

Aizawl, Mongputeni/ October 7 (Agencies): Taoba ghonda 24 tsüingda Mizoram nung nisung 1302 dak Covid-19 tashidak potetogo aser nisung trok süogo aser iba ajanga state nung tashidak menar 1,02,629 aser asür 341 jungogo, ta health department ketdangsür kati Brehostibarnü metetdakttsü.

Bodhbarnüa state nung nisung 1,471 dak covid tashidak potet aser nisung 4 asü.

Tang tashidak menartem rongnung Aizawl nungi 728 aser Lunglei district nungi nisung 147 aser Champhai district nisung 113 densema lir, ta ketdangsüri ashi.

Sample 9,749 tendangba nungi nisung 1302 dak tashidak potet asünung anogo ka nung positivity rate ji 13.35 per cent liasü, ta pai ashi.

Taoba ghonda 24 tsüingda tashidak potetertem rongnung tanur 263 aser Kolasib district jail nung tepuoker 38 densema lir, ta paisa metetdakttsü.

Tashidak potetertem rongnung parnok tenet tangalen senzüba jangjaogo saka tanungba nisung 1,295 ya state nung dang menaba lir.

Mizoram nung tang nisung 16,075 dak COVID-19 tashidak poteter temang anepaludar. Bodhbarnü taneptsü angur

nisung 1,226 densema tang tashi nung nisung 86,213 taneptsü nguogo.

Tang Covid-19 agi shirangertem rongnung taneptsü anguba rate ji 84 percent aser aser tasüba rate 0.33 per cent lir.

Tanü tashi nung state-i sample lakh 11.49 dak tema tendangogo.

Maneni state immunisation officer Dr Lalzawmi-i, tang tashi nung nisung lakh 6.84 dak tema nem vaccine agütsüogo aser item nisungtem rongnung nisung lakh 4.59 nembo Bodhbarnü tashi nung Covid-19 vaccine dose anaprongla agütsüogo, ta metetdakttsü.

Kasa mapang nung Mizoram assembly speaker Lalrinliana Sailo dak Covid-19 tashidak potetba official source kati Brehostibarnü metetdakttsüogo.

Arishi küm 62 tain Mizo National Front (MNF) lenir aser pa kinungtsü T Lalthangpuii aser par jabaso dak Brehostibarnü tashidak poteta liasü.

Speaker aser par jabaso dak tashidak keta aliba temaitsü mesayur saka pa kinungtsü dakbo sayudar.

Tang tashi nung Sailo den Mizoram minister asem densema MLA tenet dak Covid-19 tashidak potetogo. Parnok rongnung pongubo anepogo.

BJP lenir Emmanuel-i nomination file süogo



BJP lenir aser taoba mapang MLA - Emmanuel Mosahary-i by-polls nung Tamulpur Assembly constituency nungi tokteptsü atema pa indang nomination papers agütsüba yangi noksa nung angur.

Udalguri, Mongputeni/ October 7 (Agencies): BJP lenir aser taoba mapang MLA - Emmanuel Mosahary-i by-polls nung Tamulpur Assembly constituency nungi tokteptsü atema pa indang nomination papers agütsüogo.

Emmanuel Mosahary-i, by-elections atema independent candidate ka ama nomination benokogo.

Mosahary-i Brehostibarnü Assam kübok Baksa district nung Returning Officer (RO) matsüingdang pa indang nomination papers benoka liasü.

"58, Tamulpur LAC nungi by-election nung tokteptsü asoshi tanü nomination benokogo. Yimjak nung arua ni pusemertem ajak dang kanga

pelar aser talisa telung nung inyakertem danga kanga pelaba lemsateper," ta Emmanuel Mosahary-i nomination papers benokba sülen ashi.

Mosahary-i, Tamulpur nung pa metokteptsü atema party-i telemtetba agiba anema pai inyakba asoshi BJP-i pa anema jenjang agitsü akok aser iba atema pa renema lir, ta ashi.

"Party ni anema jenjang agira ni tashitsü aika mali," ta Emmanuel Mosahary-i ashi.

BJP-i Tamulpur menden ya parnok den lokteper aliba United People's Party Liberal (UPPL) nem toktsüba sülen Tamulpur constituency nung BJP züingsemtem temulung masür aser iba anema nokdakdar.



TIR YIMYIM

YIMOBILEM (EDITORIAL)

DIMAPUR ROGONÜ, MONGPUTENI(OCTOBER) 08, 2021

Tanü küm 19 buba tenzüker

Tsüngremi aniba agi aser tazüngertemi ajungshia külemi inyakba agi memetetika Tir Yimyim küm 18 jungogo aser joko tanü nungi tainba kümer küm 19 buba tenzüker. Nisung aika asoshi alima kinük ka nung nisung lakh ana-semkati jembiba oshi nung anogo shia osangkaket tilaka adokbaji kecha balaka takok tuluka masütsüa akok, saka Tir Yimyim adokertem asoshi ibai takok aser temoatsü tuluka ta züngshir aser kanga nümadanga Tsüngrem tenüng asanger aser tazüngertem ajak den pelaba lemsateper. Atangji, alima nung aikati jembiba oshi mesüra ishikati jembiba oshi ta masü, oshi ajak tajung aser oshi ajak ya sayatenya, kechiyong oshi yabo nisungi meyanglutettsü, ibai Tsüngremer mapa, anungji oshiji nisungi jembiba kiburbo teyanglur Tsüngrem lir. Iba tetezü aser jenjang mangatetba agi alima nung oshi 573 tashi tejembir kata mali samaogo aser tang jembiba oshitem rongnunga asemü nung kasübo, oshi shia tejembir nisung meyrirang ka majung lir ta asadangtetter. Item taji bilemdang dang, asen oshi mesüaka alima nung oshi paikaji samabaji kanga apayua bilemer aser sasar aser kümsa aika oaka alima mesama tashi asen Ao oshibo mesamadaktsüner. Oshi shia nung otsü keta lir aser asen Ao oshi nungsa otsü teimba keta lir amai bilemer. Ao oshi yabo, parnoki mejembiba, British aser America nungertemi dena meteta lir aser Ao oshi jembirtembo parnokia akümtsüba bilemer. Asenoki asen lima nung British aser America nungertem akümketa bilemba ama, par lima nunga parnoki Aor aser Ao oshi ya kanga meraketa bilemer. Atangji, parnoki asenok nüchi kümtsü saka nüchi kümmeükma tetsüba aser azümasen shisatsü melii, aria bilemba agi sünga temeim mulungjang agi tangar nüchi makümertem nüchi kümdaktsüyonga aoertemji Aor liasü aser parnoki parnok Ao oshi jembiba Naga kintem tanüla aser shisa tenük lapoktsüyonga aoba otsü tanü England aser America nung jembir aser kakertem nung azünger. Iba ama oshi ka jembir asütsüba asenok asoshi koda maongka tulu lir. Kodang asenoki item otsütemji metetdir, asenok dang nungibo asen chirnurtemiang tesapuba aser temeimba meima aser sapua Ao oshi jembitsü. Tangar alima kintem ama, asenoka Aor ta süaka, kin kidong balala, yimten aser arogo, yimsünga balala aser tenünga balala, aji dang masü asenok taginüba aser nükjidong balala, anungji asenok longjemnyonga kecha nunga melongjemetter, asenok longjemtsüba Aor oshi ya dang lir. Aji oda, asenok asoshi asen tetsü oshi ya asenok ajurutepdak, longjemdak aser angatetepdak tesem tajung ka lir. Iba tangatetba nung, osangkaket süaka alima nung atalokba osangtsüsang metetpelatsüba kija masü saka asen oshi mesamai sapua jembitsü aser renlokdaaktsü nükjidong nung Tir Yimyim adoker. Iba den külemi asenok rongnung onük aser maparen tapu balala nung shisalemsatepa asenok shisatsü tesadamba aser takaba akümtsü nükjidong nung angati shisa lemsatepdak Olemsabang lapoka toktsür. Aji oda, anü apu, tzunglu aru kecha mali, Covid-a liang teli, akok tashi Tir Yimyimbo kenüamati adoka nübortem nem züngdaaktsü merangogo. Iba tangatetba tanüla jagi, talisa taoba küm Covid-19 tashidak wara agi alima ajunga amokmerena shibangdaaktsüba mapanga, Tir Yimyimbo kenüa mati adoktetba asoshi Tsüngrem nung asanger aser Tir Yimyim nung inyakertem aser azüngertem ajak dang pelar. Taoba kümtem nung akok tashi asen oshi renloktsü aser asen loktiliba tangatetba nung tejakleni odaktsü asoshi kija kibong, lokti aser arogotem den longjemer sentong tapu balala agia aruba ajanga onoka shisatsü nung kanga renlokogo aser nisung ama arishi küm 18 ajung meteteteta tangatetba nung tain akümba meteter. Tsüngremi dang mulungra, ano tanü nungi tashi aser tasü itshir nübortem den osangtsüsang aser shisatsü lemsatepba maparen nung tajungba aser tenendakba inyaka aotsü merangtsü. Joko, alima aso 21 buba-pezsü nung kasübo tembanga arudagi. Iba ama putu ka nung Ao osang kakertem nung inyaktsü asoshia alima aso 21 buba nung asortem nungdaker. Aji oda, alima aienba den tsüngkang medema Tir Yimyim-a kakertem aser online na prongla nung agütsür. Anogo shia Instagram nunga, talisa lanurtem asoshi Ao ojang anana tetezü den oren agütsür. Iba tashiji Tsüngremi asenok len ania arudagi. Aji oda, alima nung tangar kintem oshi samadokaka, asen Ao oshibo teimba teimbai jembitsüba aser azüngtsüba asenok ajak arok ser ajungshitepa inyaktsü ayongzüker. Ano maneni küm 19 buba adoksa tajungba aser tajangzüktiba asütsüba, tazüngertem ajaki azüngba nung dang masü saka züluba aser metongshitsüba nunga shilem agitsü mepishir.

OLEMSABANG

Yashi, Tanü aser Asüng Ao oshi jenjang

~ Rev. C. Walu Walling (www.nokinketer.com)

(Yashi adok nungi...)

Tanabuba nung Tanü Ao Oshi jenjang:

Tanabuba nung 1955 - 2019 (küm 62) iba dangji tanü ta ajatsü akok. Ao oshi küm 62 jajayonga aruba nungji Lisor nisungtemi Ao oshi terenlok asoshi tongti shilem agiyonga aruogo. School nung tazüngtsü kakert adokba, Ao Oshi Class 10 aser 12 (MIL) final tashi agiba, Ao Senden-i Literature Board tenteta iba Board ajanga Ao Oshi terenlok asoshi tejangrartem atema Arangtet Tatidang agia Ao oshi nung, Certificate, B.A. Diploma aser PGD tashi anebalua agia arudar. Parnok dang aseni peladi.

Tanü Ao oshi kong noktaka lir, aser asüng asoshi kechi koma kolen meratemji agiba ajanga tetsükdaktsü kecha makai bener otettsü, iba khuretji aroki süoki ia bilemstsüla. 1994 - 2004 küm 10 alima ajak nung Lisor Oshi nung rangloker UN ajanga mapa inyakdangto Ao oshia terenlok asoshi jenjang kar danga agitet asübo, iba dang nungi tera temaba aser tajungba jenjang nung lila ta sasasetta bilemer. Alima kin balala otsüren timtem ajurua kin ka ajonga külemi tesama tiai aiba otsütem ama, Ao oshi atema 1988 - 2004ji tamang tia ka nung aruogo. Item indang lephsia jembitsü menüngdak, saka ibai Ao kin kenozülu nung maidoktetba tensa liasü. Iba kin ka oshi nung teshimtet ishikati kibur kümdi ta merangba ajanga atalok. Itemji parnok sasa shimteter inyakba masü, saka lokti-isa shimteter inyakdaaktsüba lenirtem liasü.

Tanüa mekümdangra telok kari oshi madak kibur küma nübör madak tashi amshitsü kecha memenu. Ibaji Ao oshi meimer ajaki süoki ia shisadangtsü atema. Oshi ka terenlok aser tejakleni aotsü atema ajaki teka amteper inyaktsü tenüngdaaktsü. Bihar nung Maithily oshi jembir aser zülur 1860 tashi nungbo nisung million 16 dak tali liasü, saka iba oshiji Hindi agi melener aruba tangbo Maithily oshiji meshimeshia samaogo ta ashir. Maithily oshi samaba ama tanü sama-a aoba aser aotsüba oshitem rongnungji mekümdangra Ao oshia adentsü. Alima mesama tashi Ao kin alitsü, saka Ao kini Ao oshi mejembira Ao oshibo samatsü. Süra ibaji shir dak tongloksütsü?

Oshi agi lokti tentet ajak lungjemdaaktsür. Ao kin kenozülu wadangji Impur nungi shilem tulu agia aruogo, saka Impuri Ao oshi aser kenozülu madak tashi kodanga mamshi. Iba jagi Ao oshi nung terenlok aser tejakleni odaktsüba nung dang shilem tajung agia aruogo. Tanü Ao oshi atema ABAM-i Aor lokti tentet ajak den amalitepa aruogo. Iba onük jembira ABAM tenzüka kenozülu wadang nung lenirtem sülen tanitaker ka süa arudang Ao oshi nungbo lokti ajak den angatetepa aser yaritepa aruba bilemteter.

Nübörtemi zülumen tsütsü Laishiba aser Osangtajung Ken Kakert nung alibaji dang agitsü ta ola adokdanga tanemi item dang Laishiba aser Ken Kakert nung zülumen meputepi lirji melenshia arurji, nübörtemi aginüba ama melenshitepa odi ta jembiba, aser yamaji inyaka aruogo. Iba den külemi temelenshiji kong kechi nungsa nungdaker, tajitbatemji tanishirtem den angatetepa melenshiyonga inyaka aruogo. Saka zülumen tsütsü tashiyim amshia kodanga inyaka maru.

Tanü Ao oshi atema tesasatsü tulutibaji SCERT ajanga adokba Heritage study nung Ao kin otsü medensemba ya asütsü. Iba khuret ya shir/shiba dak tongloksütsü? Shir/shiba mapang nung ya atalok ta memenu Ao oshi meimer lanurtemi bushisa akümtsü südi.

Tejakleni aoba kin otsüji yamai dang asütsü na. Tenzükba maparen nung nisung shia yayim balala agi loktiji tenzükerji, tip külen nungi dang repringdangra tanü Ao oshi atema ABAM dang nungibo Ao Senden-i ang (ASLB) tali aroka nendaka inyaker ama ajiteter. ABAM aser arogo lenirtemi kechi bilemer.

Ao kin oshi atema ABAM aser Ao Senden (ASLB) mensem ka mena Ao oshi terenlok atema Mokochung/Impur nung shisa lemsatep agiba jagi Ao Senden/ABAM tuluba/tilaba akümer masü, saka ibai ajanga Ao oshi jembirtem atema akhüm tuluba aser tesadamba nung oshi renlokdaaktsür dang asütsü. Tanü iba tapokji tuluka makümdang ABAM aser ASLB, telok ana tsüngda temulung lapoka pei oshi terenlok asoshi mapa inyaktsü tenüngdaaktsü ta ajiteter. Takoktsüka asübo ABAM-i Ao oshi terenlok asoshi telemtetba ka agir kümsük atakzüka yur küm shia sen lezmükja ASLB den yaritepa, Missionary mapang nungi tanen makai yariba nükmen mesamai asüng Ao oshi terenlok asoshi shilem tajung agir asütsü.

Ao oshi terenlok mapa nung ajaki ajangshiba kaji zülumen nung ajurua aruogo. Saka ASLB ajanga adokba Arok Osep, 2019 kakert nungi medemdanga zülura, zülumen tsütsü khuret kanga tulubo masütsü südi.

Tanü Ao oshi wadang nung mamatettsüba maitsü lungzüngji: 1. Ao Dictionary 1999, Prof. Renty Keitar; 2. Ao Osep 2005, C. Walu Walling; 3. Tetsü Meli, 2013, Tir Yimyim; 4. Arok Osep, 2019 ASLB ya asütsü. Item dakji ajemdaker tanü Ao oshi melenshiyonga arudagi. Talisa Arok Osep nung mabensaba aser mayimjembatemji tarutsü nung tali tabensaba tayimjembiba küma yanglushitsü kecha tasak masü. Iba Osep nungji tongben ojangtem olasü densema adoktsüba ajanga tamshirtem atema melamela-a zünga otettsü lenmang sayuogo.

Tanü Ao oshi jenjangji mera tasen ka agiloksemogo, aji NU ajanga Ao oshi B. A., nung azüngtsü temelaba agütsüba alitsü. Ibaji tanü Ao oshi atema osangtajung rongnung tajungtibaji asütsü. Süra Aor Aotsürtemi B.A. tashi nung Ao oshi tongti süa agitsü tejangraba lida ma. B.A. tashi nung Ao oshi agirtemji FAC, Mokochung nung dang kakertshir ishika lir. Saka Mokochung district nung aliba College-tem nung Aor Aotsürtem ajak Ao subject-ji tongti süa magitettsüba tenokdangba kar ali asü?

Iba den ano Kohima aser Dimapur Govt. College-tem nung Ao oshi aginür kakertshirtem lir ma? Parnoki dang pei tetsü oshiji agidi süra, item dang sayutsü atema ASBL ajanga PGD in Ao Arangtet Tatidang kanga junga renemer alirtem yoktsü peria kar. Mesüra tatentep mapang item dang sayutsü atema nübör peria kar. Iba 2020 nungibo mapa tenzüka aotsü kanga tongtibang.

Class 10 nung Ao subject Govt.-i agizükba apibo tang mapang yabo Ao oshia University level nung zünya alitsüba sür nung tanü asen mapang, iba mapang tajungji malangzükteti süidaktsüogo ta sasasetta bilemer. Iba yagi asenok talangka mejanga liogo ta kuli sayur, Tanüa Ao oshi tatentep lenjem ka nung lir, Tamang yimsü, osaren telok balala, nung na dena alitsü akok, saka Ao oshi nungji telungjem ajanga maitsü ayak aser shisangren kar ta angatetra asenok ajak teka amteper asüng Ao oshi tejakleni anitsü apusodi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

SoCal Harvest nung nisung 6,000 dak temai Khrista agizük



October 2, 2021 nü Anaheim, California nung aliba Angel Stadium nung SoCal Harvest sentong agidang tangokba noksa nung angur.

October 07, 2021: Amongnü (October 2) Anaheim, California nung aliba Angel Stadium nung Pastor Greg Laurie-i ayongzükba SoCal Harvest sentong nung nisung 40,000 shi aden aser iba sentong nung nisung 6,000 dak temai tang mezüng Khrista nem taküm bendanga agütsü. Coronavirus wara aliba agi yakumbo SoCal Harvest ya magi.

Riverside nung aliba Harvest Christian Fellowship nung pastor, Laurie-i ayongzükba sentong ya alima tesem balala nungi nisung 200,000 dak temai live repranga liasü. Kasa sentong nung For King & Country, Phil Wickham, Kirk Franklin aser Tori Kelly nungeria shilem agia ken aten.

Facebook post ka ajanga Laurie-i SoCal Harvest nung nisung 6,000 dak temai Khrista nem bendanga agütsüba osang lemsatep.

"Amongnü aonung Angel Stadium nung agiba SoCal Harvest nung Tsüngremi mapa inyakba atema tang tashi onok pelateper. Iba stadium nung nisung sünga adenshir Tsüngrem külema liasü," ta pai facebook post ajanga metetdaksü.

"Ni iba sentong nung

'Atangji nai kechi bushir?' ta asüba onük jemi. Stadium nung nisung 40,000 dak tema liasü aser alima tesem balala nungi nisung 200,000-i online ajanga iba sentong nung aden. Tajungtibaji- nisung 6,000-i Khrista nem taküm bendanga agütsü. Tsüngrem dang sentsüwangshi süang! Nenok sarasadem atema ajak dang pelar!" ta pai lemsatep.

CBN Prayer Link den interview ka nung jembidang pastor Laurie-i, osangtajung ajanga dang meimchir melungjang melenshitsü akok, ta ashi.

"Iba ya jangratemtsüka liasü, kechiyong wara ajanga asenok mapang talangka pilar liasü aser iba wara ajanga nisung ajak kongshia liasü. Temesepba mozü achir aika kümogo, yi jemer aika kümogo, balalulaba kanga bulua kümogo, aser ibaji nisungtem mepelaba ajanga lir. 'Nenoki item tatalokba tenzükba kodang ngudir kümzüksü mapang ana nung lir ta bilemang' ta Yisui ashi. Osangtajung ajangadang meimchir ka melung melenshitetsü," ta pai ashi.

Laurie-isa, tanü alima nung nisung aika kanga rongjener aser Khrista ajangadang iba nungjagi nüchiba angutsü, ta

ashi. "USA Today-i agiba survey ka ni tawa züngshia liasü. Parnoki lanurtem dang nenok taginü kechi ta asüngdang, aser parnok timbakati takar kümner mesüra nungtugu kümner ta langzua liasü. Social media ajanga nisung ajaki nungtugu kümner ta ni bilemer," ta pai ashi.

"Takar akümba mesüra nungtugu akümba ajanga na melung asütsü asü; süra kechiba tang alima nung takar aser nungtugu nisung aika jashia dang alir? Ni nüburtem den lemsatepnüba osangji ya-social media nung followers aika aliba agi kecha masütsü. Takar akümba mesüra nungtugu akümba ajanga telangzüba mangutsü. Khrista ajanga dang telangzüba angutsü. Tsüngrem metetsü atema na yanglu, nai atangji bushibaji Khrista lir," ta paisa ashi.

SoCal Harvest ya 1990 küm mezüng Laurie aser Calvary Chapel tentetsang pastor Chuck Smith, nati southern California nung tenzuka liasü aser SoCal Harvest tenzükba sülen küm 30 ajungbamong 2019 küm monga liasü. US nungbo evangelistic sentong talangtibaji ibai lir.

Odisha nung Khristan kibong ana dak mejungi azük

October 07, 2021: Odisha kübok Badliguda yimdak apuani, Mangal aser Baja Raba na mapang talangka alir aser tena ajungbena tashie shiranga mozü achiba den külemi arasentsür teyari bushi aser shiruru tenla-a agütsü saka shirang manep.

Küm pongu tashi tena shiranga aruba mapang nung tenati Yisu Khrista indang angashiba sülen tenati anasa aliba yim kati oa Tenla kidang sarasademdakja liasü.

Tena shiranga aruba otsü lemsatepba sülen iba Arogo nungji pastor, Ruben Madkami-i par yim semdanga tena atema sarasademtsü, aser sayatenya ajanga

tenaprong anepba sülen tenati Khristan yimsü agizüka liasü.

Iba tatalokba sülen ita asem tashi Pastor Madkami-i par kidangji Amongnü tekülem sentong agia aru, ajisüaka par kidang nisung timba-timba adenshibaji meteta Hindu yimsü alia amanger nisung 50 dak tema par kidangi arua tekülem sentong nung adenertem amokmeren. Parnoki Khristantem dang Hindu yimsü dangi tanaben memeyipra yimdak melidaksütsü, ta ashi.

Ajisüaka Khristan kibong ana jagi Hindu yimsü dangi tanaben meyiptsü memelung, anungji Hindu nungertemi parnok dak mejungi azükba

sülen lenmang nung yutsü.

Police Station nung ken o ka benok saka police-i aibelenertem anema kecha meinyak aser Khristan kibong anajia yimdak nungi ajentsüsa aküm, ta International Christian Concern (ICC)-i metetdaksü.

"India nung Khristantemji bendanger yimsü amangertem amai züngshir aser Khristantem aliba ajanga yimtsüngtem nung tia tamajung ajurur ta tai tongloksür. Khristantem dak azüker aser tepseter. Ibaji dang masü kinüngertemia Hindu yimsü dangi tanaben meyiptsü rongshir aser yimdaklirtemi sendoker," ta ICC-i metetdaksü.

ANOGO ABEN TSÜNGREM DEN

Tebendang mebeshiba

"Kechiyong Tsüngrem tsüngdangbo tejak ajia inyakba maka." Rom 2:11

Ali meimchirtemi inyakba mapatem nungbo aiben tulur-tilar, takar-sensaker aser tashitemeteter-memeteter tsüngda bendanga angur.

Tsüngrem shiba ajak yanglusang, ajak metetsang, ajak moatsüsangibo Pai yangluba rongnung kecha tebandang makai kasa jenjang nung yanglu, kechiaser Pai teyangluba ajak nung junger ta pei sasa ashiba Lipok tapu 1-2 nung lir.

Tsüngremer shisatsü tarokji kodang aroka shisadangdir nisunger tangatetba agi Pa rajem shisatsü indangji asadangtsü tamakoktsü. Pai anüng aser alima nung kechisa yangluogo, ajungaji pa tsüngdang kasasa dang yanglu.

Teyangluba ajak jagi pei pei lenmang nungi kecha telemsa makai Tsüngrem sentsüwangshidakja inyaktsütsü nükjidong yur yangluba pa inyakim ajanga angateter.

Temeim amangbapurtem, aseni inyakba mesüra tenzükba wadangtem nung anogoshia alidang nai aser ni inyakba/tenzükba jagi Tsüngrem aser nisung ajaki au ta agizüktetsüsa kecha nunga tebandang makai benshitetba tenzükker ka asütsü Tsüngrem nungi tangatetba shisatsü meshia alitsü mamatokli.

SARASADEM

Kibuba Tsüngrem, ni nisung tsüngda tejak repranga inyaka lira kü dang tai tokangma. Amen

Kaduna State nung leper ka nung Khristan 38 külemi arem



October 07, 2021: Rev. Ephraim Kafang-i, September 26, 2021 nü Nigeria nung Kaduna State kübok Madamai yimdak leper ka nung Khristan 38 tasü mang külemi arem; leperji metong nung süklep 30, lenden süklep 15 aser süklep 5 tarok liasü, ta International Christian Concern (ICC)-i metetdaksü.

Asüpila sentong nung jembidang Rev. Michael Cosmas Magaji-i mangyimertem melung süngzükja, "Atangji asenok jashir saka asenoki tamakok mangu. Asenoki timtem jenti ajangshiyonga asenok melulatsü, kechiyong Tsüngrem tashi asen den lir," ta ashi.

September 26 nü Fulani kiralongrar teloki Madamai yim amakba mapang nung Khristan 38 asü, 9 yiru aser ki 46 raksaja liasü. Kasa anogo nungjisa kasa teloki Kpachudu yimdaka Khristan pezü tepseta liasü.

ICC den jembidang Christian Association of Nigeria (CAN) Secretary, Rev. Ephraim Kafang-i, "Nigeria nung Khristantem tia ya kanga majung. Joko tesüiba küm 20 jungnüa Khristantem tepseter saka ibaji nokdangtsü atema sorkari kecha meinyaker," ta ashi. Kafang-isa, "Khristantem kümzüksü atema yimsüsürtemi melungteta meinyaker. Tang Nigeria nung Khristantem anema inyakba ya iba linük ya Islam linük kümdaksütsü nükjidong nung inyaker, ta ni bilemer," ta metetdaksü. Madamai yimdak nisung 3,000 shi lir aser tesüiba ita ka tsüngda Muslim Fulani teloki anaben amakdang nisung 40 dak tema süogo. August 15 nüa iba yim amakba mapang nung Khristan pongu tepset, aika yiru aser ki 20 raksaja liasü. Yimdak nungi nisung 200 dak tema jena ogo aser parnok meyiipa marutsüa akok, ta Kaura Youth Association Secretary, Anthony Timothy-i metetdaksü.

Srinagar nung tesayur ana khasetba aitsür: J&K LG Manoj Sinha



October 07, 2021 nü Srinagar kübok Eidgah tesem nung telungpurtemi Government Boys Higher Secondary School nung tesayur ana khasetba sülen security sepaitemi iba tesem anükba noksa nung angur.

Srinagar, Mongputeni/ October 07 (Agencies): Brihostibarnü Jammu & Kashmir Lieutenant Governor, Manoj Sinha-i, Srinagar nung tesayur ana khasetbaji ni sashia aitsür; aibelenertem nem temerenshi tulu agütsüsü, ta metetdaksü.

"Kiralongrartemi ozü tesayur ana- Supinder Kour aser Deepak Chand na tepsetbaji ni sashia aitsür. Tai maket nisungtem tepsetertem nem temerenshi tulu agütsüsü," ta Sinha-i twitter ajanga metetdaksü.

"Kiralongrartem aser parnok pusemertemi J&K UT nung tesünep, terenlok aser azükaru raksatsüsü meranger saka parnok tebilembaji mataloktsü.

Mangyimer kibong aser külem tenzükertem den ni mangyim jashi lemsateper," ta paisa metetdaksü.

Brihostibarnü kiralongrartemi Srinagar kübok Eidgah tesem nung aliba Government Boys Higher Secondary School nung tesayur ana khaseta liasü. Supinder Kaur ya iba school nungji Principal liasü aser Deepak ya Kashmiri Pandit liasü.

Tesüiba anogo pongu tsüngda Kashmir Valley nung civilian tenet tepsetogo.

Kasa tatalokba dak sendakba nung Congress-ia, BJP-i Kashmir Valley nung Kashmiri Pandits meküzmüteter, ta aitsü.

Congress Tir, Sonia Gandhi-i Jammu & Kashmir nung party lenirtem dang mangyimer kibongtem yariang, ta tuyuogo.

Congress-i sangdong ka ajanga, "BJP sorkari Kashmiri Pandits aser civilians meküzmütetba ya parnoki region tashi meitdaksüba ajanga lir. Sepaitem timba akümba aser rara tali adokba ya ajanga sorkar tashi maitba kuli sayur," ta metetdaksü.

Congress lenir Rahul Gandhi-ia, "Kashmir valley nung nisung tepsetba kanga bulua ataloker. Demonetisation benokba den Arlla 370 agienyonga rara manener. Centre sorkari security agütsüba tsüsü tamakok nguogo," ta aitsü.

PM Modi-i PSA Oxygen plant 35 semzüktsü

Bhubaneswar, October 07 (Agencies): Brihostibarnü Ato kilonser, Narendra Modi-i state balala nung Pressure Swing Adsorption (PSA) oxygen plant 35 semzüktsüogo aser item plants rongnung pezübo Odisha nung semzüktsü.

Odisha nung PSA oxygen plants pezüji Subdivisional Hospital (Angul district), District Headquarters Hospital, Puri, Vikash Multi Speciality Hospital, aser District Headquarters Hospital, Sambalpur nung amenok.

AIIMS Rishikesh-i ayongzükba sentong nung

Modi-i linük nüburtem atema item plants semzüktsü. Video conferencing ajanga Odisha nunga IndianOil nungi tongti ketdangsertem, paramedical staffs, doctor tem aser nurse tem aden.

"Odisha atema Centre-i PM CARES kübok anogo ka nung MT 75 adokdaksüba liquid medical oxygen (LMO) semzüktsüogo. Iba nungjagi LMO MT 71 bo IndianOil-i commission asü," ta ketdangsertem osang ka ajanga metetdaksü.

Item oxygen plants ya PM CARES fund kübok

amenoktsü. Tang tashi nung PM CARES kübok PSA Oxygen Plants ajak senteper 1,224 amenokogo.

Coronavirus wave tanabuba mapang nung linük nung aliba hospital aika nung medical oxygen agi kanga anünga liasü, ibayongji sorkari district shia nung PSA oxygen plant kakabosa amenoktsüsü lemteta liasü.

Ketdangsertem osang ka ajanga ashiba agi, item plants ketdangsüa reprangtsü aser anepalutsü atema nisung 7,000 dak tema nem training agütsüogo. Item plants ya web portal ka ajanga achaayanger.



New Delhi, October 07, 2021: LPG jenjang maneni atuba dak sendakba nung Brihostibarnü Congress headquarters nung Congress lenir, Alka Lamba-i osangbenertem den jembidang tangokba noksa nung angur.

Oct, Nov aser Dec itatem nung kanga kümdangtsüla: Centre

New Delhi, October 07 (Agencies): Brihostibarnü Union Health Ministry-i nüburtem dang, benjung mongpu aser kiyimba mongpu nung coronavirus wara kanga proktsüa akok, anungji October, November aser December itatem nung kanga kümdangtsüla, ta metetdaksü.

New Delhi nung osangbenertem senden ka nung jembidang health ministry ketdangsertemi, India nung tain nütsüng 71-ibo coronavirus dose kabosa agiogo aser iba nungjagi shilem 27-ibo dose anaprong agiogo, ta metetdaksü.

Health Ministry-i, "State 12 aser UTs kübok district 28 nung hopta shia coronavirus positive putetba shilemji 5 nungi 10 tsüngda lir. State 9 aser UTs kübok district 34 nungbo hopta shia positive putetba shilem 10 dak tema lir," ta metetdaksü.

Coronavirus wara ano messama, anungji maneni iba wara nungi kümzüka alitsü

atema ajaki inyaksüla, ta sorkari metetdaksü.

Union Health Ministry nung joint secretary, Lav Agarwal-i, "Tang anogo shia nisung 20,000 shi dak coronavirus puteter. Iba nungjagi shilem 56 bo Kerala nungi liasü," ta metetdaksü.

Lav Agarwal-isa, "October, November aser December itatem nung asenok kanga kümdangtsüla. Lokti aliba tesemi maotsüla, nungdak melira ainlen mesenzütsüla, kidang amongtsüla aser online ajanga dang benjung amongba den shishilembatsüla," ta ashi.

Benjung mongpu tonga arudar, anungji coronavirus wara sashia proktsüa akok, ta shia sorkari nüburtem dang vaccine agitsü, wara anema tetuyuba balala benshitsü aser longsolongben masütsü metetdaksü.

India nung ano nisung 22,431 dak coronavirus putet aser tang tashi nungbo linük nung nisung ajak senteper 3,38,94,312 dak iba tashidak putetogo.



October 07, 2021 nü Bengaluru nung aliba Bangalore Medical College nung medical student temi PG academic fees ajemang aser magütsüi aliba allowance tekaraba nung agüjang, ta takhangba agüja longkak aitba noksa nung angur.

Lakhimpur Kheri tatalokba dak sendakba nung Ashish Mishra jaoker

New Delhi, October 07 (Agencies): Tawa Uttar Pradesh kübok Lakhimpur Kheri district nung rara adoka nisung ti asüba dak sendakba ken o nung state police-i Union Minister, Ajay Mishra'er jabaso, Ashish Mishra jaokogo.

Lucknow IG Lakshmi Singh-i, iba tatalokba dak sendakba nung nisung ana dang asüngdangyadar, aser tenati osang aika metetdaksüogo, ta ashi.

Singh-i, "Nisung ana dang asüngdangyadar. Tenati nisung asemia shilem agiba shiogo saka parnokjibo süadokogo. Tenati osang aika metetdaksüdar. Iba tatalokba nung tongti shilem agisang (Ashish Mishra) dang asüngdangyatsü atema jaokogo," ta ashi.

Minister of State for Home, Ajay Mishra aser par jabaso, Ashish Mishra natibo iba tatalokba nungji parnoki shilem agi mali, ta aiben shiogo.

Minister-i, par jabaso shilem agia aliba kuli metetra pai minister menden nungia anentsü, ta shiogo.

Rara adokba tesem nungji Police-i injang terepa aika angu. Ajisüaka IG Lakshmi Singh-ibo, "Iba tatalokba nungji prangpong aser injang amshi asü mamshiar tang tashi nungbo mejangja, anungji tanga kulitem nung ajemdaker onoki maneni bushisüngdangtsü," ta ashi.

Brihostibarnep Supreme Court-ia Uttar Pradesh sorkar dang iba tatalokba nung tai tonglokja alirtem, FIR aser pua alirtem indang report renemer agüjang, ta tuyuogo.

Taoba Amongnü aluyimertem longkak aitba sülen senshiba mapang nung SUV gari ana arua aluyimertem dak tsükoktsüba nungi rara tulu adoka liasü aser iba rara nungji aluyimer pezü aser gari ana nungji mena alir pezü asü.

Philippine tir menden atema Leni Robredo-i tokteptsü Central Mali nung sepia 16 kaset



Quezon city, Metro Manila, Philippines nung Philippine Vice President Leni Robredo-i linük tir atema tokteptsü sangdongba mapang tangokba noksa ka yangi angur. Robredo, shibai opposition telok anir lir, lai taruba küm tir election nung tokteptsü, ta Brehostibarnü sangdongogo.

Tagalog, Mongputeni/Oct. 07 (Agencies): Philippine Vice President Leni Robredo-i 2022 küm May ita tir election agiba nung shilem agitsü sangdongogo, anungji tang teinyakdak Tir Rodrigo Duterte melentsü asoshi tokteper aika kumogo.

"2022 election nung tir atema candidate ka ama ni sangdonger. Ni raratsü. Asenok külemi raratsü," ta Robredo-i Brehostibarnü Tagalog nungi metetdaksü.

"Asenoki timtem ajangshiba kanga jangja meteta lir. Asenoki tiazü aser tim masüba nung tashi amshiba nguogo. Parnok ket

nung sen aser machinery lir."

1986 küm nüburtemi anema nokdakba sülen yimsüsür menden nungi anentsüsang jabaso Ferdinand Marcos Jr-i tir menden atema tokteptsü sangdonger lia Robredo-i sangdongba ajanga yimya melenshir. 2016 küm vice president atema toktepa mapang Robredo-i tera agi Marcos madak takok ngua liasü.

2016 küm tezüngzüktep agiba sülen arishi küm 56 tain Robredo ya Duterte indang vice president inyaka arur. Saka inyakyim aika nung Duterte tena meputepi lia aru aser pai

temesepba mozü anema raraba ya tamakok ka lir, ta lai aitsü.

Philippines nung tir aser tatong tir ya balala shimteter, anungji Duterte aser Robredo na ama party balala nungi candidate shimtsüsa akumer aser aiben mepetmesü ajurur.

"Asenoki sentong tejen aser tamajung koktettsü. Temelenshi atema külem Filipinos nem tashi meyipa agütsütsü," ta lai Brehostibarnü ashi.

Tang tesüsa tentetba coalition kati taoba hopta la dang tir atema tokteptsü nunglokja liasü, kechiaser tang yimsü tesüdak telok nung tapok apar.

Taoba Brehostibarnü iba mapa nungloktsüba mapang vice president-i telemtetba agitsü atema bilemsü mapang tali agüjang, ta mepishia liasü.

Tang tashinung Philippines tir menden asoshi tokteptsü sangdonga alirtem ya Robredo den boxing asayar mongin Manny Pacquiao, taoba Senator Ferdinand Marcos Jr, Manila Mayor Isko Moreno aser taoba mapang police tanishir inyaka alisang aser tang teinyakdak Senator Pangilo Lacson nungertem alitsü.

Bamako, Mongputeni/Oct 07 (Agencies): Central Mali nung telungpur temi amakba lendong ka nung sepai 16 asü aser 10 yiru, ta security aser health ketdangsürtemi ashi.

Mali indang mitkartemi mezüingbo sepai pungo takum sama aser ti yiru, ta shia liasü. Saka central Mali nung inyaker health ketdangsür kati nisung 16 asü aser 10 yiru, ta ashi.

Security osang ka ajanga nisung timba asüba ya jangjatsü.

Bodhbarnü iba lendong ya Mopti region kübok Bodio yimtsüng anasa atalok, kong al-Qaeda aser ISIL (ISIS) den sendaktepa aliba telungpur temi Mali nung azüdokshiba tesem tiyongtsü lir, ta anasa aliba Bankass jila nung mayor Moulaye Guindo-i osangbener dang ashi.

"Astürtem aika liasü: sepai 16 asü, jihadist 30 tepset aser nisung 17 yiru," ta pai osangbener dang ashi.

Mali indang army temi sangdong ka nung, sepaitemi IED amshia amaker aridokogo, ta ashi.

Mali nung 2012 küm linük north tsütsü tenzükba rara tantg

tashi maziüokteti lir aser iba rara nung mitkar aser civilian meyrirjang aika tepsetogo.

Central aser northern Mali nung telungpur temi Mali sepaitem, parnok yariba France sepaitem aser United Nations peacekeeper dak tenük yoker mapang shia amaker.

France aser UN sepai meyrirjang aika liaka central Mali nung iba rara agi sünger ano anasa aliba Burkina Faso aser Niger tashi prokshia aor.

Sahel region nung central Mali ya tesem tamajungtiba ka kumogo, kong kin balala tepsetba aser sorkar meyong sepaitem dak amakba mapang shia ajangshir.

Iba region nung telungpur temi lenmang tezülen bomb aser IED tem rema yutsür.

September 20 nü iba region nung IED ka poka Mali sepai pezü takum sama. September 12 nüa central Mali nung telungpur temi atsüka atar amakba nung sepai pungo asü.

Lendong anaprong ya al-Qaeda den sendaktepa aliba Group to Support Islam and Muslims (GSIM) ajanga tenüng agia liasü.

Pakistan menoknok nung nisung 20 asü aser aika yiru

Islamabad, Mongputeni/Oct. 07 (Agencies): Pakistan southwest tsütsü Balochistan province nung menoknok tesashi anokba lendong nung nisung 20 asü aser 200 dak tali yiru, ta yangji aliba ketdangsürtemi ashir, kong rescue team temi jana müreka nisung kumzüksü meranger.

Provincial capital Quetta nungi anüdoklen kilometre 100 shi pilar Harnai district nung nisung timba mejanga orr lia menoknok magnitude 5.9 ya Brehostibarnep 3:00 ako (par mapang) süyia nung anoka liasü, ta United State Geological Survey data ajanga ashi.

Iba menoknok ya ali telung nung kilometre 20 tarok lur anak. Iba lendong nung nisung tajemba agi 200 yiru, ta provincial disaster management authority ajanga ashi.

"Ketdangsürtem iba tesem tonga oa yaritepa mapang lir," ta provincial disaster management ketdangsür Osama bin Ijaz-i osangbener dang ashi.

Harnai nung ki-o-jen raksaba indang survey ka tang agiba mapang lir, ta pai ashi.

Iba menoknok anokba sülen Pakistan Ato Kilonser Imran Khan-i yangji alir nem arisanga teyari agütsütsü totuyuba agütsüogo.

Menoknok anokba ajanga anentsüh alua lenmangtem nokdanga tekumzükba maparen nung tetsükdaksü agütsür, ta provincial minister Zia Langove-i osangbener dang ashi.

"Yangji anentsüh aisü nung alua lir, aser resuce team temi lenmang mürekba mapang lir," ta Langove-i ashi. Tekumzükertem iba tesem tongtetba sülen ang teraksa ajurua aliba tali tejangja metettsü, ta pai ashi.

Tekumzükter kar Harnai nung menoknok agi kongshia aliba tesem tongogo aser kangasa mejungi yirur aliba nisung tuko tayimtsü ajanga Quetta-i bener ao, ta Pakistan mitkartemi ashi.

Army doctor aser paramedics temi civilian ketdangsürtem den yaritepa iba lendong agi kongshir alirtem anepalur aser yaritepa maparen tekeraba nung inyaksü mechi urban search & rescue team pur Rawalpindi tesem nungi tayimtsü nung anir ao, ta ashi.

Balochistan ya Pakistan nung province tulutiba saka nütsüing yongsük tajemtiba aser terenlok agi aiben mokongshir aser national human development indicator rankings nunga tsüinglanglen ang alir.

Menoknok anokdak Harnai tesem nung nisung aliba ki ya timba ajong aser long agi yangluba lir, anungji menoknok agi kanga mela raksatsür.

Asürtem ya timba kilem aser jara laoba ajanga asü, ta provincial sorkar nung ketdangsür Suhail Anwar Hashmi-i ashi.

Asürtem rongnung tetsür ka aser tanur trok liasü, ta pai ashi.

Abdulrazak Gurnah-i 2021 Nobel Prize in Literature nguogo

Stockholm, Mongputeni/Oct. 07 (Agencies): Tanzania nung kaket zülur Abdulrazak Gurnah-i 2021 Nobel Prize in Literature takok ngutetogo, ta iba sempet agütsüba telok ajanga ashi.

Iba senpet ya Brehostibarnü Swedish Academy ajanga agütsü, aser Gurnah-i 'colonialism' aser refugee tia indang kanga junga zülü, ta ashi.

Gurnah ya Zanzibar nung aso aser England nung amenoka University of Kent nung professor inyaker.

Gurnah-i novel ter aser otsü tatsü aika zülüogo. Pai 1994 küm züluba "Paradise" novel ajanga pa kanga nungtugu akum, koba First World War mapang colonial East Africa nung ajemdaker zülü aser Booker Prize for Fiction nunga shortlist

süa liasü.

Nobel Committee for Literature indang mendenpuba Anders Olsson-i pa ya alima nung colonial sülen kaket zülur tejangja ka lir, ta ashi.

Iba konang tetushi nungya gold medal ka den Swedish kronor million 10 (USD 1.14 million) dena alitsü.

Gurnah-i iba sempet ya Stockholm nung December 10 nü King Carl XVI Gustaf nungi agizüktsü liasü. December 10 ya scientist Alfred Nobel asüba anogo lir, shibai pa indang rongsen nungi iba senpet ya agütsütsü molungtet.

Saka tashidak wara agi alima ajanga asüngba ajanga kümna buba sentong ya magiteter, anungji television nung sentong agia pei linük nungi sempet ya agizükter.

1901 küm mezüingbuba Nobel agütsüba sülen literature nung nisung 118 nem iba sempet ya agüja lir, aser parnok ringnung nisung 95 bo Europe mesüra North America nungi lir.

Taoba küm iba senpet ya America nung sangro mejemer Louise Gluck nem agüja liasü.

Hombarnü Nobel Committee ajanga physiology mesüra medicine tsütsü iba sempet ya America nung David Julius aser Ardem Patapoutian na nem agütsü aser Mongulbarnü Nobel Prize in Physics ya scientist asem nem agütsü.

Nobel Prize for Chemistry ya Bodhbarnü Benjamin List aser David WC MacMillan na nem agüja liasü.

Ano iba sempet ya peace aser economics nung agütsütsü lir.



Nobel Prize for Chemistry sempet angur nisung ana rongnung MacMillan nem akum agüja October 6, 2021 nü Princeton, N.J nung Princeton University Nobel Prize laureates Eric Francis Wieschaus, biologist; Joseph Hooton Taylor Jr., astrophysicist; David W.C. MacMillan; Duncan Haldane, physicist; Angus Deaton, economist; aser Christopher Sims, economist nungertemi yi marok anüngleni ajungketba noksa nung angur. Germany nungi Benjamin List aser Scotland nung asosang David W.C. MacMillan nati tzu-mopung memenei molecules yanglutetba ajanga iba sempet ya agüja liasü.

Mkg nung Minister Along-i Oxygen Plant ka lapoktsüogo



Mokokchung, Mongputeni/October 07, 2021: IMDH Mokokchung nung Minister for Higher Education & Tribal Affairs, Nagaland, Temjen Imna Along-i 200 LPM Oxygen Generation Plant lapoktsüba mapang tangokba noksa ka yangi angur.

Mokokchung, Mongputeni/October 07, 2021 (TYO): Brehostibarnü, IMDH Mokokchung nung PM Cares fund kübok, Minister for Higher Education & Tribal Affairs, Nagaland, Temjen Imna Along-i 200 LPM Oxygen Generation Plant ka lapoktsüogo, ta sangdong ajanga metetdaksü. Iba sentong nung, Minister Along-i ashiba agi, tanü district nung Pressure Swing Adsorption (PSA) Oxygen Plant ka lapoktetba ya Mokokchung nung alir nüburttem atema kanga dang

tongtibang asütsü, koba ajanga Mokokchung district nüburttem dang masü saka kidanger district nung alir taküm aika kümzüksü. Alima ajunga asungba Covid-19 wara ajanga senti taküm aika samaogo. Mokokchung nunga nüburttemi iba wara anema raratsü asoshi sorkar tetuyuba nung anidaka aser amalitepa inyaka aruba yong taküm aika kümzüko, ta pai ashi. Covid-19 wara anema raratsü nükjidong yur lenmang balala ajanga nungita yariba atema, Along-i District Task Force, Doctor aser Nurse; aser

Front Line Workers ajak, ABAM aser Arogo balala, NGOs aser kija shia dang pelaba metetdaksü. Iba sentong tenzüka, Executive Secretary ABAM, Rev. Dr. Mar Pongen-i sarasadema liasü. Deputy Commissioner Mokokchung, Limawapang Jamir aser Ao Senden, President, Chubawati Longchar nati o jembi. CMO, Mokokchung, Dr. Chubala Aier-i tepela anküp o jembi aser sentong nung MS, IMDH, Mokokchung, Limatula Aier menden liasü, ta kasa sangdong nung shia lir.

Happy 80th Birthday
Mr. Imtitongzuk Jamir
"Kupu apuba kolakji sentsüwangshi korang; Aji temeshiba taküm ajanga ajanzüker".
- Apijemtsu Shin 16: 31
Oba, onok kibongtem asoshi na shisatsü aser tashi. Onok aientsü asoshi, nai tera tonga yangertsüogo.
Temeim Jalatem, Anükapang aser Semchirtem.

METETDAKTSÜR
Dimapur Changtongya Fellowship calander nung agütsüa aliba ama 10th Oct' 2021 Fellowship sentep alitsü Govt. SOP ajanga asenok lokti tekülem 100% sentepsü mela-ogo. Aji asünung nisung ajaki sarasadema iba sendong nung arua adentsü metetdaksür. **Tesentepdak:** Yinsem Fellowship Nagarjan, **Mapang 1:00 pm**

No: N-1402/10/2021-NI (E 18060)
 Government of India
 Ministry of Social Justice and Empowerment
 Department of Empowerment of Persons with Disabilities
 Room No. 517, 5th floor, AntyodayaBhawan,
 CGO Complex New Delhi 110003
 Dated 29th September 2021
Appointment of Director, Pt. Deendayal Upadhyaya National Institute for Persons with Physical Disabilities (Divyangjan) (PDUNIPPD), New Delhi
 Matambansar tem (Divyangjan) (PDUNIPPD), New Delhi atema Director, Pt. Deendayal Upadhyaya National Institute indang post atema application jaoker. (PDUNIPPD) ya Ministry of Social Justice & Empowerment (MSJ&E), Department of Empowerment of Persons with Disabilities (Divyangjan), Government of India kübok achaayangba tentet ka lir. Iba Post atema Pay Matrix indang Level 13 nung shia aliba (Rs. 123100 - 215900) den allowance agütsütsü aser küm ana atema mezüing Deputation/Short Term Contract nung tenüng agütsür inaktsü, koba mapa inyaka asadangshir sülen, küm 5 tashi atsülangtsütsü akok.
 2. Advertisement tejangja, application format etc. Department www.disabilityaffairs.gov.in indang website aser iba Institute i.e. <http://www.iphnewdelhi.in/> indang website nung angutsü. Employee news nung iba osang sangdongba anogo nungi tenzüka application agizütsü atema, anogo 45 tashi mapang lapoktsür.
 (Navin Kumar)
 Under Secretary to the Government of India

 davp 38117/11/0028/2022

State Museum nung Photography Exhibition lapoktsüogo



Kohima, Mongputeni/October 07, 2021: State Museum, Kohima nung Additional Secretary IPR, Asangla Imti-i Photography Exhibition lapoktsüba mapang tangokba noksa ka yangi angur.

Kohima, Mongputeni/October 07, 2021 (TYO): Brehostibarnü, State Museum, Directorate of Art & Culture, Kohima nung Additional Secretary IPR, Asangla Imti-i Photography Exhibition lapoktsüba den India nüjiso ngur küm 75 ajungba "Azadi Ka Amrit Mahotsav" benjongmung sentong agiogo, ta sangdong ajanga metetdaksü. India nüjiso ngur küm 75 ajungba nungtem nung Information & Public Relations Department ajanga iba sentong ayongzüka liasü. Azadi Ka Amrit Mahotsav ya India Sorkar indang mapatong ka lir. India nüjiso ngur küm 75 tashi renloka aruba aser linük nung nüburttemi

inyaktetba, sobaliba putiotsü aser angzükbatem bilemteta benjongteptsü nükjidong nung iba mapatong tenzüka. Iba sentong nung taoba mapang Director IPR Limawati Ao, IPR ketdangsur aser staff tem, Art aser Culture ketdangsurtem, Kohima Press Club President, Alice Yohshu aser temolunger balala aruagi denogo. Iba photography exhibition nung, Nagaland Statehood ngur külen nungi tongtibang nisungtem, shirnoki Nagaland semdang, parnok indang noksa aser tatalokba tongtibangtem den State nung renloka aruba maparentem sayua liasü. Naga kin sobaliba ajungkettsütsü aser renloka

odaktsütsü aser nüburttem dang sayutsü asoshi State nung jangjateta aliba kintem pei kin sobutsü semer tangokba noksa densema kin ajunga indang noksatem sayuogo. Iba exhibition ya Hornbill Festival 2021 matem tashi State Museum nung sayutsü sentong lir. Nüburttemi iba museum semdangba den külemi exhibition reprangdaksütsü nükjidong yur State Museum nung iba sentong ayongzüker. Iba State Museum ya Hombar (11.10.2021) nungi tenzüka working days' ajak nung anepdang 9:30 ako nungi nikongdang 3:30 ako tashi nüburttem atema lapoktsütsü, ta kasa sangdong nung shia lir.

Minority Morcha BJP Nagaland-i sentong balala ayongzüker

Dimapur, Mongputeni/October 07, 2021 (TYO): India indang Ato Kilonser, Narendra Modi sor küm 71 ajungba aser nüburttem zükbawadang nung pai küm 20 tashi takok ngua inyaka aruba tepela temaitsü sayutsü aser akhüm agütsütsü atema, Minority Morcha BJP Nagaland indang züngsemtemi PWD Junction nung #swacchbharatabhiyan ayongzüker, Jain Temple Road kübok S. D. Jain Vaccination Center nung teyari agütsü, Nepali Basti nung tzübo ka merüktet aser Ato Kilonser & Global Leader, Narendra Modi dangi meyongnem 5,000 agüja aliba "Thank You" card ka yok, ta Minority Morcha BJP Nagaland, Ajay Sethi, State VP & Media Convenor-i sangdong ajanga metetdaksü. Convenor Manoj Sethi, State Secretary aser Sharatchandra Singh, Neeta Agarwal den Anita Roy Chowdhury nung



India vice president, M. Venkaiah Naidu-i 7th October 2021 nü pa tsüngdong marui online (virtually) ajanga Yajen Aier Government High School Mopungchuket lapoktsür külen Mokokchung Deputy Commissioner, Limawabang Jamiri shilem agiba mapang tangokba noksa nung angur. Mokokchung, 7th October, 2021 (Courtesy: Mokokchung DPRO)

ISSF Junior World Championship: India tetsür team-i gold medal angu



Lima, Mongputeni/October 07, 2021: ISSF Junior Shooting World Championship nung, (abilen nungi) Rhythm Sangwan, Naamya Kapoor aser Manu Bhaker nungeri 25m Pistol team asayamung nung gold medal anguba sülen tangokba noksa yangi angur.

Lima, Mongputeni/October 07, 2021

(Agencies): Tang asaya aliba International Shooting Sport Federation (ISSF) Junior World Championship - tetsür 25m pistol team asayamung nung, India tetsür team-i gold medal nguogo. Iba tetoktepba nung Manu Bhaker, Rhythm Sangwan aser Naamya Kapoor nungeri shilem agia liasü.

Tetsür 25m pistol team tetoktepba nung, India team-i point 16-4 agi America tetsür team tsükdakja gold medal angu. India tsür Manu Bhaker-i iba asayamung nung gold medal pezübuba aser bronze medal ka angur asütsü. Kasa asayamung nung, arishi küm 14 tain Kapoor-i iba championship nung gold medal tanabuba nguogo.

Tetsür kija 25m pistol

asayamung nung Naamya Kapoor ya world junior champion ka kümogo.

Tebur 25m rapid fire pistol kija tetoktepba nung, India atema Adarsh Singh-i silver medal ka nguogo. Final nung Adarsh-i America nunger Henry Turner Leverett makok.

Iba Shooting asayamung tenzüker anogo tinübuba (Bodhbar) nung, India team-i medal tally temaba jenjang tongteta tembang.

Tetsür 25m pistol team final nung, rapid-fire shots indang series 8buba metenzükdang, Manu, Rhythm aser Naamya nungeri ayong ayonga 10-4 agi America tetsür team tejakdang ser asaya aser 16-4 agi parnoki iba asaya koktet.

Mongolbarnü, par asempronlgai point 878 nguteta round one qualification temaba jenjang tongtet, koba point trok agi tanabuba jenjang nung alir France team tejakdang liasü.

Kasa anogo, parnoki gold medal match tongtetsü atema tanabuba round nunga takok tajung angu, kong par asempi point 446 ngua liasü. America team-a final tongtetsü atema qualifying round tanabuba nung parnoki point 437 angu.

21buba NSF MM Trophy nung team 52 agi shilem agitsü

Kohima, Mongputeni/October 07, 2021 (TYO): 21buba Naga Students' Federation (NSF) Martyrs Memorial (football) Trophy atema, Manipur State nungi team 2 densema, team 52 agi shilem agitsü osang jangjaogo, ta sangdong ajanga metetdaksü.

Angami Students' Union (ASU) ajanga ayongba asayamung ya Kohima kübok AstroTurf Indira Gandhi Stadium nung October 9 nungi tenzüka November 6, 2021 tashi asayatsü terenemba lir.

Iba asayamung Organising Committee indang Convenor, Dievi Yano-i, team 52 agi iba asayamung nung shilem agitsü, kong Manipur nungi team 2 aser tanünga team 50 ji Nagaland kübok tesem balala nungi asütsü, ta osang jangjatsüogo.

Taküm NSF Martyrs Memorial Trophy nung category' balala nung takok angurtem atema senpet ajak sentepa lakh 5.40 shi agütsütsü terenemba lir, ta Yano-i ashi.

Takok angur team nem senpet lakh 2 aser runner-up nem senpet lakh 1.20 agütsütsü. Ano, semi-finalist team ana nem

senpet 30,000 (30,000 each) aser quarter-final nung tamakok angur team nem senpet 15,000 (15,000 each) agütsütsü.

Item senpet dak alaka, asayar tajungtiba kija shia nem senpet 10,000 tashi highest scorer, best custodian, best defender aser best mid-fielder nem agütsütsü. Iba den külemi, player of the tournament atema award balaka agütsütsü renema lir, ta paisa ashi.

Honibar (09.10.2021) nikongdang 4:30 ako meta iba asayamung lapokba sentong agütsü aser sentong nung, Manipur State nungi Minister for PHED, L Dikho tongti tesemdang ama aruagi adentsü.

Maneni, iba asayamung atema, Brehostibarnü fixture yangluogo, kong New Market XI aser Phesama Youth Organization tsünga mezüng match asayatsü; iba match aonung asayatsü. Iba sülen, mezüng round match tem anüngdang asayatsü. Quarter final nungi final tashi match tem aonung asayatsü. November 1 nungi quarter tenzüksü aser November 6 aonung final asayatsü, ta kasa sangdong nung shia lir.

T20 World Cup sülen Nick Webb-i mapa toktsütsü

New Delhi, Mongputeni/October 07, 2021

(Agencies): India tebur cricket team indang 'strength aser conditioning' coach, Nick Webb-i aruya aliba T20 World Cup sülen, iba mapa toktsütsü. New Zealand nunger Nick-i küm nung ita 5 nungi ita 8 tashi t a n g a l e n / b e n d a n g l e n senzüsebongtsü mejangra yong, pai iba mapa toktsütsü lemtet.

Taoba cricket ODI World Cup temer Shankar Basu-i iba mapa toktsüba sülen, 2019 küm strength aser conditioning ama India team nung Nick Webb anioka liasü. Ajisüaka, Covid-19 wara melungi süshia aoba sülen, Webb-i par kibong toktsür bendanglen senzüsebongtsü timtem ajuruba ajanga pai iba mapa toktsütsü renema lir.

"T20 World Cup sülen, kü contract atsülangtsü bilema mali ta BCCI dang tawa osang agütsüogo," ta küm ana sülen India tebur cricket team indang 'strength aser conditioning' coach mapa toktsüsang, Nick Webb-i Instagram nung lemsatep.

"Kanga shisadanger sülen ang iba telemtetba agir kechiyong pei kibong atema bilemstüji tongtibang. Tang, New Zealand-i aotsü alir sensopur atema COVID dak

sedakba tenokdangba kuli ajanga telemtetba ya agir," ta Webb-i ashi.

Tang, nisung kar danga New Zealand-i aotsüsa kümra, parnok anogo 14 institutional quarantine nung amungtsü nüngdaker.

"Ashiko, tarutsü nung item tenokdangba salatsü akok. Ita 5 nungi 8 tashi kibong nungi pilar alitsü ya tasak, ibayongji T20 World Cup sülen mapa toktsütsü lemtet," ta Webb-i ashi.

"Tarutsü nung kechi ang ajurujar mejangja, saka ni pela pelaa dang lir. T20 World Cup nung India tebur cricket team akokba tashi nungitta yaritsü asoshi kü dak aketba sempet tajungtiba amshia inyaksü ni renema lir," ta paisa ashi.

Webb-i asayamung balala nung India team-i takok anguba indang jembiogo aser team nung teyariteper ka ama inyaksü maongka anguba asoshi pelar ta lemsatepa liasü.

"Tesüiba küm ana dak tema India aser Indian cricket team tenüng nungi shilem agitsü maongka anguba asoshi pelar. Iba mapang team ka ama, lenla aika nung onok renloka aruogo. Iba den külemi team ka ama onoki otsütsüsa inyakogo, asaya balala nung takok aser tamakok ajangshiogo," ta pai ashi.

Nations League: Spain final-i iogo

Milan, Mongputeni/October 07, 2021

(Agencies): San Siro Stadium kübok Nations League semi-final nung, Spain team-i European champion telok - Italy indang world record (37-match unbeaten) tembangja, iba asaya kokogo. Semi final asaya nung, Spain atema Ferran Torres-i goal ana idakja Spain-i goal 2-1 agi Italy tsükdaksü.

Luis Enrique'er teloki (Spain) iba asayamung semifinal akoktsüa atema, mezüng half nung, Torres-i goal ana tashi inokja liasü. Spain-i Deobarnü France mesüra Belgium den semi-final asayatsü. Tanabuba semi final nung France aser Belgium na asayatsü terenemba lir.

Spain goal 2-0 agi Italy tejakdang ser asayaba mapang, asaya tatemlen minute 83buba nung Lorenzo Pellegrini-i goal ka idaktsü, saka iba goal dak alaka European champion puri tanabuba goal idaktsütsü maongka mangu. Mezüng half atemtsü lia, Italy nunger L. Bonucci-i asaya dak mapet yimya benshiba atema pa nem red card agütsü aser tanabuba half nungi Italy team nung

asayar 10 agi dang asayatsüsa kümadok.

Italy, shirnoki Euro 2020 semi-final nung Spain tsükdaksü, Nations League semi-final nung Leonardo Bonucci tekatsü agi Sergio Busquets tejak nung kongshiba atema minute 42buba nung referee-i pa dang yellow card tanabuba sayuba sülen, Italy pur asayar 10 agi dang tanünga asaya nung shilem agitsüsa aküm.

"Mezüng half tashi nung telok anaprongla goal 1-1 nung tembanger alitsüba. Ano, onoki kümdanga asaya asübo, asaya tatem tashi asayar 11 agi asayar lila; aser tang ama jenjang ka nung, asaya tom ka nungi asayar 10 dang kümadokba ya taktsüka," ta Italy coach Roberto Mancini-i ashi.

Italy goalkeeper Gianluigi Donnarumma-i Paris Saint-Germain Club nung adenba sülen, San Siro Stadium nung asaya tenzüksü lia, AC Milan fans temi Donnarumma mepelai agizük.

Donnarumma, shiba alima nung goalkeeper rongnung tajungtiba ka ama züngshir Euro asayamung nung pai 'Player of the Tournament' award angu. Taküm tsüklawa mapang, Donnarumma-i AC Milan toktsür PSG nung aden aser pai Milan toktsür aoba ajanga fans tem kanga jashidaktsüba ajanga semifinal nunga Italy fans temi pa dang kanga mepelai liasü.

"Fans temi pa (Donnarumma) pela magizükba ajanga onok kanga tezütangadok, kechiyong Italy asaya liasü aser iba League ya Club asayamung ka masü," ta Mancini-i osangbener dang ashi.

Pre-match warm-up atema Donnarumma moapu telungi aitba mapang, fans tem mepelaba ajanga nemnemtepa liasü aser iba asaya atema team tenüngtem zünga ashiba mapang, speaker ajanga sangdongba ola mangashitsüsa stadium nung fans temi tebang agi whistle apua aser kari ola tulu adoka nemnemtepa.

BILEMDANGANG

"Alima asoshi nokdaksü arendaker, saka wadang kokerbo ajaki akhüm agütsür."